

**Bataaxal bu jëkk bi Yàlla may Pool,
mu bind ko**

WAA TESALONIG

1 ¹Nun Pool, *Silwan ak Timote noo ngi leen di bind, yéen mbooloom ñi gëm ci dëkku Tesalonig te nekk ci Yàlla Baay bi ak Boroom bi Yeesu *Kirist. Yal na yiw ak jàmm ànd ak yéen.

Li xibaaru jàmm bi jur ci dëkku Tesalonig

²Bët bu set nu ngi sant Yàlla ndax yéen, di leen boole ci sunuy ñaan. ³Dunu noppee fàttaliku ci kanam Yàlla sunu Baay jëf ji juddu ci seen ngëm, liggéey bi tukkee ci seen mbëggeel, ak muñ gi sosoo ci seen yaakaar ci sunu Boroom Yeesu *Kirist.

⁴Bokk yi, yéen ñi Yàlla bëgg, xam nanu ne Yàlla tànn na leen ; ⁵ndaxte xibaaru jàmm, bi nu leen doon yégal, yemul woon ci ay wax rekk, waaye àndoon na ak kàttan ak *Xel mu Sell mi ak kóolote gu mag. Xam ngeen sunu taxawaay ci seen biir ngir seen njariñ. ⁶Aw ngeen sunuy tànk ak yu Boroom bi, ci li ngeen nangu xibaar bi ci biir fitna yu metti, ànd ak mbég ci dooley Xel mu Sell mi. ⁷Noonu ngeen daldi nekk royukaay ngir ñi gëm ñépp ci diiwaani Maseduwan ak Akayi. ⁸Ndaxte kàddug Boroom bi jollee na ci seen biir, te yemul ci Maseduwan ak Akayi rekk, waaye seen gëm Yàlla siiw na fépp. Matul sax nu di ci wax dara, ⁹ndaxte ñoom ci seen bopp ñooy seede li sunu ngan def ci seen biir. Maanaam, ni ngeen dëddoo xërëm yi, jublu ci Yàlla te di ko jaamu, moom miy Yàlla Aji Dund ju dëggu ji, ¹⁰te ngeen di séentu Doomam bàyyikoo asamaan, moom Yeesu mi mu dekkal te di nu musal ci merum Yàlla mi nara ñëw.

Ni léen Pool ganee

2 ¹Waaw, bokk yi, xam ngeen ne ngan gi nu leen ganesi woon du nganug neen. ²Laata nuy ñëw, jaar nanu ci fitna ak toroxte ca dëkku Filib, ni ngeen ko xame ; waaye Yàlla sunu Boroom may na nu fit, ba li tongoonte bi metti lépp it, yégal nanu leen xibaaru jàmm bu Yàlla bi. ³Ndaxte sunu waaraate wéeruul cig réer

walla ci njoblanj walla ciy nax. ⁴Waaye gannaaw Yàlla moo nu seet, ba wóolu nu te dénk nu xibaaru jàmm bi, kon noonu lanuy waaree, du ngir neex nit ñi, waaye ngir neex Yàlla miy seet xol yi.

⁵Masunoo jay kenn, yéen xam ngeen ko ; sunu waare masula èmb bégge, Yàlla seede na ko ; ⁶masunoo sàkku ngërëmu nit, muy ci yéen, muy ci ñeneen. ⁷Manoon nanoo diis ci seen kaw sax, nun ñiy ndawi *Kirist, waaye woyofoon nanu ci seen biir, te lewet ni jaboot buy uuf doomam. ⁸Cofeel gi nu am ci yéen tax na, bëggunu wona yem ci xamal leen xibaaru jàmm bu Yàlla bi, waaye jox leen it sunu bakkan, ndaxte sunu xol seeyoon na ci yéen. ⁹Bokk yi, yéena ngi fàttaliku sunu coono ak sunu ñaq ; xam ngeen ni nu liggéeye guddi ak bëccég, ngir baña diis ci seen kaw, ci di leen yégal xibaaru Yàlla.

¹⁰Naka sunu diggante ak yéen ñi gëm, doxal nanu ko doxalin wu sell te jub te amul sikk : seede ngeen ko, te Yàlla it seede na ko. ¹¹⁻¹²Xam ngeen ne dénk nanu leen kenn-kenn, ni baay di def ak doomam, défalal leen seen xol te dëggal ci yéen, ngeen dund dund gu neex Yàlla, moom mi leen di woo, ngeen séddu ci nguoram ak ndamam.

¹³Te it dunu noppee sant Yàlla ci lii : ba ngeen jotee kàddug Yàlla, gi nu doon waare, nangu ngeen ko, waxuma ni kàddug nit waaye ni kàddug Yàlla, ndaxte moom la ci dëgg-dëgg, te mu ngi jëf ci yéen ñi gëm. ¹⁴Ndaxte bokk yi, aw ngeen ci tànk mboolooy Yàlla, yi nekk ca réewu Yawut ya tey daje ci turu Kirist Yeesu ; fitna ya ñu daj ca Yawut ya, yéen it seen waa réew teg nañu leen ko. ¹⁵Ñoom Yawut yi rey nañu Boroom bi Yeesu, ni ñu reye woon yonent yi ; teg nañu nu fitna yu metti ; neexuñu Yàlla, ànduñu ak kenn, ¹⁶di nu teree wax ak ñi dul Yawut, ngir bañ ñu mucc. Duñu noppee xuus ci biir bàkkaar, waaye merum Yàlla xëppu na ci seen kaw.

Yéeneb Pool ngir gis léen

¹⁷Nun nag bokk yi, ba ñu ma leen xañee ab diir —xol yi taxul may wax, waaye jëmm yi rekk— jéem nanu leena gis ak sunu kem kàttan, ndax namm nanu leen, ba sunu xol seey ci gis leen. ¹⁸Kon jàppoon nanu leena seetsi— man Pool sax ay yooni yoon, waaye *Seytaane téq na ma. ¹⁹Ndaxte bés bu Yeesu sunu Boroom délsee, te nu fekke ko, kan mooy sunu yaakaar ? Kan mooy sunu mbég ? Kan mooy sunu *kaala, gi nuy tiitaroo ? ²⁰Xanaa du yéen ? Waaw, yéenay sunu ndam, yéenay sunu mbég.

3 ¹Kon nag, ba nu ko manatula dékku, nangu nanu ñu bàyyi nu, nun doŋŋ, ca dèkku Aten, ²te yónni nanu Timote, sunu mbokk ak sunu nawle ci liggéeyu Yàlla ak ci waareb xibaaru *Kirist. Yónni nanu ko, ngir mu dénkk leen, tey feddali seen ngëm, ³ngir kenn baña raf ndax nattu, yi ngeen di jaar. Yéen ci seen bopp xam ngeen ne nattu mooy sunu cér. ⁴Ba nu nekkee ak yéen sax, waxoon nanu leen, waxati ko ne fàww nu sonn ; te noonu la ame, yéen xam ngeen ko. ⁵Noonu ba ma ko manatula dékku, yónnee naa, ngir xam fu seen ngëm tollu, ngir ragal Seytaane^a fiir leen, ba sunu ñaq neen.

⁶Waaye léegi Timote bawoo na ci yéen, indaale xibaar yu neex ci seen ngëm ak seen mbëggeel ; xamal na nu ne yéena ngi am pàttaliku yu rafet ci nun te namm nu lool, ni nu leen namme, yéen itam. ⁷Noonu bokk yi, ci biir tiis ak coono yi nu nekk, seen ngëm dëfal na sunu xol. ⁸Ndaxte noo ngi dund dëgg-dëgg, ndegam yéena ngi sax ci Boroom bi. ⁹Ndaw cant yu bare yu nu wara sant Yàlla ndax yéen ! Ndaw mbég mu bare, mi nu am ci kanamam ndax yéen ! ¹⁰Guddi ak bëccëg nu ngi wàkkirilu ci ñaan Yàlla may nu nu gis leen, ba mana mottali seen ngëm.

¹¹Yal na Yàlla sunu Baay moom ci boppam ak Yeesu sunu Boroom jubal sunu yoon ci yéen. ¹²Yal na leen Boroom bi dolli mbëggeel gu tar, ngeen bëggante te bëgg ñépp, ni nu leen bëgge nun. ¹³Yal na Boroom bi samp seeni xol noonu ci sellaa gu amul sikk fa kanam Yàlla sunu Baay, ba bés bu Yeesu sunu Boroom délsee, ànd ak gaayam yu sell yépp.

Pool xiir na léen cig sell

4 ¹Léegi nag bokk yi, jot ngeen ci nun, nan ngeen wara dunde ba neex Yàlla, te moom ngeen di def. Waaye ci turu Boroom bi Yeesu nu ngi leen di ñaan ak a dénkk, ngeen gën koo feddali. ²Ndaxte xam ngeen ndigal, yi nu leen jox ci wàllu Yeesu Boroom bi. ³Lii nag mooy coobarey Yàlla : ngeen sell, maanaam ngeen moytu njaaloo ; ⁴ngéen not seeni cér ci cell ak tedd, ⁵te xemmem bañ leena jiital, ni xeeti àddina yi xamul Yàlla. ⁶Ci mbir mii nag, bu kenn ci yéen laal yëfi jaambur, ngir bañ koo tooñ. Ndaxte waxoon nanu leen bu yàgg te artu leen ne, ñiy def loolu, Boroom bi dina léen mbugal. ⁷Ndaxte Yàlla woo na nu, nu dund ci cell, waaye du ci sobe. ⁸Ku tanqamlu

^a3.5 Seytaane : maanaam fiirkat bi.

wax jii nag, defoo ko nit, Yàlla nga ko def, moom mi leen di jox *Xel mu Sell mi.

⁹Ci lu jëm ci bëggante ci seen biir, matul nu leen di bind dara, ndaxte Yàlla def na ci seen xol, ngeen bëggante. ¹⁰Te moom ngeen di def ci bokk yépp, yi ci diiwaanu Maseduwan. Waaye bokk yi, maa ngi leen di xiirtal, ngeen gën cee sax. ¹¹Fullawooleena dund ci jàmm, di topptoo seen mbiri bopp tey lekk seen ñaq, ni nu leen ko sante woon. ¹²Noonu dingeen dund dund gu jekk ci kanam waa àddina, te it dungeen soxlaal kenn dara.

Ndekkitel ñi dee ak bésu Boroom bi

¹³Ci mbirum ñi nelaw nag bokk yi, bëggũnu ngeen réere mbir, ba tiis ni aji gëmul, yi amul benn yaakaar. ¹⁴Ndegam gëm nanu ne Yeesu dee na te dekki, noonu it Yàlla dina indaale ak Yeesu ñépp ñi ko gëm te nelaw.

¹⁵Nu ngi leen di wax lii tukkee ci Boroom bi : nun ñiy dund te des fi, ba kera Boroom biy délsi, dunu jiitu ñi nelaw. ¹⁶Ndaxte ndigal lu jamp dina jib, baatu kilifa ci malaaka yi dégtu, liitu Yàlla jolli, te Boroom bi moom ci boppam dina wacce ca asamaan. Booba ñi gëm *Kirist te dee dinañu jékka dekki ; ¹⁷gannaaw loolu nun ñiy dund te des fi, dinañu ne fëyy ak ñoom jëm ci niir yi, taseji ak Boroom bi ci jaww ji. Te noonu dinanu nekk ak Boroom bi ba fàww. ¹⁸Kon nag na ku nekk di dëfal sa xolu moroom ak kàddu yooyu.

5 ¹Waaye bokk yi, ci li jëm ci jamono yi ak waxtu, yi loolu di am, matul nu leen ciy bind dara. ²Ndaxte xam ngeen bu wér ne ni sàcc di ñëwe guddi, noonu la bésu Boroom bi di ñëwe. ³Fekk nit ñiy naan : « Lépp a ngi ci jàmm, ba ne leww, » booba musiba bett léen, ni aw mat di bette jigéenu biir, te kenn du ci mucc. ⁴Waaye yéen bokk yi, nekkuleen cig lëndëm, ba tax bés boobu bett leen ni sàcc. ⁵Ndaxte yéen ñépp ci leer ak bëccëg ngeen bokk ; bokkunu ci guddi ak lëndëm. ⁶Kon nag bunu nelaw ni ñeneen ñi, waaye nanu xool te maandu. ⁷Ndaxte ñiy nelaw, guddi lañuy nelaw, te ñiy màndi, guddi lañuy màndi. ⁸Waaye nun ñiy waa bëccëg, nanu maandu te ràngoo ngir xare bi : ngëm ak mbëggeel, muy kiiraayu dënn, ak kóoluteg mucc, muy mbaxanam xare. ⁹Ndaxte Yàlla jaglewu nu meram, waaye mucc la nu jagleel ndax darajay sunu Boroom Yeesu Kirist. ¹⁰Deeyal na nu, ngir nu mana dund ak moom, bu nu nelawee ak bu nu

nelawagul. ¹¹Kon nag nangeen dëgëralante te yokkante seen ngëm, ni ngeen koy defe.

Dénkaane yu mujj yi

¹²Gannaaw loolu bokk yi, ci lu jëm ci njiit, yi Boroom bi teg ci seen kanam te ñuy liggéey ci seen biir, di leen artu, maa ngi leen di ñaan ngeen déglu léen ; ¹³rax-ca-dolli ngeen naw léen seen kem kàttan te bëgg léen ndax seen liggéey. Na jàmm am ci seen biir. ¹⁴Bokk yi, nu ngi leen di dénk, ngeen yedd ñi feñaag, dëfal ñi seen yasara yàcciku, dimbali ñi néew doole, tey muñal ñépp. ¹⁵Saxleen ci baax ci seen biir ak ci ñépp, te baña feyantoo. ¹⁶Deeleen bég ¹⁷te sax ciy ñaan Yàlla, ¹⁸di ko gërëm ci lépp, ndaxte loolu mooy coobarey Yàlla ci yéen ci seen bokk ci *Kirist Yeesu. ¹⁹Buleen fey taal Xelum Yàlla, ²⁰di xeeb waxu yonent yi. ²¹Waaye seetleen mbir yépp, jàpp ci li baax, ²²dëddu lépp lu ci bon.

²³Yal na leen Yàlla miy Boroom jàmm sellal, ba ngeen mat sëkk ; yal na sàmm seen xel mépp, seen xol bépp ak seen yaram wépp, ngir dara bañ cee am sikk, ba bés bu sunu Boroom Yeesu Kirist délsee. ²⁴Yàlla, mi leen woo ci loolu, kuy sàmm kóllère la, te dina ko def.

Tàggoo

²⁵Bokk yi, buleen nu fàtte ci seeni ñaan.

²⁶Nuyul-leen nu bokk yépp ak safoonte bu laab. ²⁷Maa ngi leen di dénk ci kanam Boroom bi, ngeen jàngal bataaxal bii bokk yépp.

²⁸Yal na yiwu sunu Boroom Yeesu *Kirist ànd ak yéen.